

UDHËZIM
Nr.42, datë 9.12.2008

**PËR REGJISTRIMIN E PRANIMEVE PËR PLOTËSIMIN E KUOTAVE TË
PAREALIZUARA NË CIKLIN E PARË TË STUDIMEVE, ME KOHË TË PLOTË, NË
INSTITUCIONET PUBLIKE TË ARSIMIT TË LARTË, NË VITIN AKADEMIK 2008-
2009**

Në mbështetje të nenit 102 të Kushtetutës, të nenit 33 të ligjit nr.9741, datë 21.5.2007 “Për arsimin e lartë në Republikën e Shqipërisë”, të ndryshuar dhe të pikës 17 të vendimit nr.1037, datë 2.7.2008 të Këshillit të Ministrave “Për kuotat e pranimi dhe tarifat e shkollimit në institucionet publike të arsimit të lartë, për ciklin e parë të studimeve me kohë të plotë, për vitin akademik 2008-2009”,

UDHËZOJ:

1. Të regjistrohen në institucionet publike të arsimit të lartë, në ciklin e parë të studimeve, me kohë të plotë, sipas programeve përkatëse të studimit, kandidatët që shpallen fitues në bazë të kuotave të përcaktuara në udhëzimin nr.40, datë 22.11.2008 “Për plotësimin e kuotave të parealizuara të pranimeve në ciklin e parë të studimeve, me kohë të plotë, në institucionet publike të arsimit të lartë, në vitin akademik 2008-2009”.

2. Kandidatët fitues përcaktohen nga Agjencia Kombëtare e Pranimeve në Institucionet Publike të Arsimit të Lartë (APRIAL), në bazë të dy parimeve:

a) Parimi i meritës: sipas pikëve të grumbulluara në bazë të rezultateve të shkollës së mesme, të provimeve të Maturës Shtetërore dhe për disa programe studimi edhe të rezultateve të konkursit, të zhvilluar në bazë të udhëzimit nr.24, datë 3.6.2008 “Për zhvillimin e konkurseve të pranimi, tarifën e regjistrimit për konkurrim, në disa programe studimi në ciklin e parë me kohë të plotë në institucionet publike të arsimit të lartë, për vitin akademik 2008-2009”.

b) Parimi i vullnetit të kandidatëve i shprehur nëpërmjet preferencës më të lartë të zgjedhur prej tyre në formularin A4.

3. APRIAL përpunon të dhënat e marra nga formularët A4 dhe në datën 9.12.2008 shpall listën përfundimtare të kandidatëve fitues të ndarë sipas programeve të studimit përkatës, të renditur sipas rendit zbritës të pikëve dhe preferencës më të lartë të kërkuar prej tyre në formularin A4, në përputhje me kuotat e përcaktuara në udhëzimin nr.40, datë 22.11.2008 dhe njëkohësisht e dorëzon këtë listë në Ministrinë e Arsimit dhe Shkencës.

4. Ministria e Arsimit dhe Shkencës dorëzon në datën 10.12.2008, në formë të shkruar dhe elektronike, listat përfundimtare të kandidatëve fitues sipas programeve përkatëse të studimit, në institucionet publike të arsimit të lartë dhe DAR/ZA. Këto institucione afishojnë menjëherë listat në vende të dukshme në mjediset e tyre.

5. Regjistrimi i kandidatëve fitues bëhet pranë sekretarive mësimore të institucioneve publike të arsimit të lartë nga data 11.12.2008 deri në datën 16.12.2008. Për regjistrim, kandidati duhet të paraqitet personalisht pranë sekretarive mësimore dhe të dorëzojë dosjen individuale, me dokumentet origjinale të mëposhtme:

a) Dëftesë pjekurie;

b) Dokument identifikimi (certifikatë lindjeje me fotografi ose pasaportë). Në dosje të mbahet vetëm certifikata e lindjes me fotografi ose fotokopja e pasaportës;

c) 2 fotografi;

d) Mandatarkëtimi i tarifës së regjistrimit prej 1500 lekësh.

6) Në rast se kandidatët fitues nuk kanë dëftesë pjekurie origjinale të kërkuar në pikën 5/a të mësipërme, të paraqesin dublikatën e dëftesës së pjekurisë së lëshuar nga drejtoria e shkollës së mesme dhe të vërtetuar nga drejtoria arsimore rajonale/zyra arsimore përkatëse.

Këta kandidatë të evidentohen edhe në lista të veçanta nga sekretaritë mësimore të

institucioneve publike të arsimit të lartë, të cilat të dërgohen në Ministrinë e Arsimit dhe të Shkencës. Pas verifikimit të bërë nga Ministria e Arsimit dhe e Shkencës, të bëhet regjistrimi përfundimtar nga sekretaritë mësimore të institucioneve publike të arsimit të lartë.

7. Sekretaria mësimore e pajis kandidatin që regjistrohet me një fletëregjistrimi, ku të shënohet numri i regjistrimit, emri i kandidatit, si dhe data dhe ora e regjistrimit. Fletëregjistrimi duhet të jetë i nënshkruar nga dekani dhe kryesekretarja mësimore e fakultetit, e vulosur.

8. Në kryerjen e procedurës së regjistrimit të kandidatëve fitues, sekretaritë mësimore të institucioneve publike të arsimit të lartë regjistrojnë studentët në regjistrin bazë të studentëve, në bazë të udhëzimit të Ministrisë së Arsimit dhe Shkencës nr.19, datë 18.7.2007 “Për gjenerimin dhe dhënien e numrave të matrikullimit”.

9. Pas përfundimit të procesit të regjistrimit, institucionet publike të arsimit të lartë të dorëzojnë në MASH dhe në APRIAL listat përfundimtare origjinale të përgatitura nga APRIAL me regjistrimet e kryera, në formë të shkruar dhe elektronike brenda datës 18.12.2008.

10. Institucionet publike të arsimit të lartë nga data 10.12.2008 t’i shpallin në vende të dukshme në mjediset e tyre, datat dhe oraret e veprimeve të regjistrimit, procedurat përkatëse, listën e dokumenteve të nevojshme për regjistrim, si dhe të dhëna të tjera që i gjykojnë të nevojshme për sigurimin e ecursë normale të procesit të pranimeve në ciklin e parë të studimeve me kohë të plotë, në institucionet publike të arsimit të lartë.

11. Këto njoftime të bëhen publike edhe në median e shkruar dhe elektronike nga institucionet publike të arsimit të lartë.

12. Ngarkohen për zbatimin e këtij udhëzimi Zëvendësministri për Arsimin e Lartë, sekretari i përgjithshëm, Drejtoria e Politikave të Arsimit të Lartë, APRIAL, institucionet publike të arsimit të lartë dhe DAR/ZA.

Ky udhëzim hyn në fuqi menjëherë dhe botohet në Fletoren Zyrtare.

MINISTRI I ARSIMIT DHE SHKENCËS
Fatos Beja